

## CREPIS RIGIDA.

Crepis ramis pedunculisque rigidis, incurvo - erectis; foliis dentatis, inferioribus obovato - cuneiformibus; calycibus canis, squamis extimis apice fuscis.

RADIX perennis, simplex, recta profundeque descendens, digiti auricularis crassitie, extus fusca, intus alba, medulla pallide flavescente, superne in duo aut plura capita divisa, totidem fere caules proferens.

CAULES tri - quadripedales, non raro etiam altiores, rarius breviores, erecti, calamum scriptorium aut digitum auricularem crassitie æquantes, firmi rigidique, obtuse angulati, basi purpurascens albo - pilosi, superne sulcati, nudi, subflexuosi, sæpe tantum in summitate paucos ramos floriferos proferentes, alias autem, cum vivacius incrementum habent, per longitudinem duorum etiam pedum ramiferi: ramis axillaribus brevibus rigidis, angulo prope recto proceduntibus, inde arcuatim erectis.

FOLIA crassa, rigidiuscula, scabra, dentata, acuta, apice dentibusque fuscis aut nigricantibus, utrinque venosa, venis subtus eminentibus, nervo lato supra plano pallido aut purpurascens: radicalia & caulina infima obovato - cuneiformia, in petiolum decurrentia, posice sinuato - laciniata, versus apicem sinuato - dentata, utrinque fetulis brevibus albis hispida; caulina reliqua amplexicaulia, fetulis brevissimis scabra: inferiora ovata, sinuato - dentata dentibus ad angulum rectum patentibus; superiora sagittata, sinuato - dentata dentibus subrecurvis; summa hastata, non nisi versus basin dentata, alia integerrima.

FLORES in ramis uni - bi - trifloris, innixi pedunculis crassis, rigidis, teretibus, more ramorum ad angulum rectum proceduntibus & arcuatim erectis, jam aphyllis, tantum basi folio subulato apice sphacelato stipatis, jam unam alteramve squamam tenuem sub calyce gerentibus, lateralibus centrali plerumque longioribus.

CALYCES ovati, toruloso - angulati, angulis quatuordecim, basi tecti squamis triplo brevioribus adpressis apice acuto sphacelatis, interioribus apice obtusiusculo flavis ciliatis.

COROLLULAE tubulo pallido, ligula lineari, flava, inæqualiter incisa quadri - fida aut quinquefida.

GENITALIA congenerum, flava, corollulis breviora.

SEMINA oblonga, sulcata, fusca, pappo piloso sessili coronata, receptaculo nudo insidentia.

Tota planta lactescit, & saporis amari est. Partes ejus virides albo - canescunt, maxime calyces. Per culturam minus pilosa & minus cana evadit, & folia caulina sæpe hastæ formam induunt, laciniis baseos divaricatis acuminatis, eademque repando - dentata fiunt, dum inferiora dentes recurvos exhibent.

Crescit in montibus apricis ad Budam, Csákvár & Tokay.

Floret Julio in Augustum.

A Crepide sibirica, pro qua plantam hanc nostram ob radicem perennem nonnulli habent, eam distinguere vix interest; cum discrimen e data descriptione & icone facile pateat. Certe Crepidis character, qui in sibirica planta adeo dubius est, ut *Gmelinus* eam contra mentem *Linnaei* ad Hieraciam retulerit, in nostra est manifestissimus.

## PEUCEDANUM ARENARIUM.

Peucedanum foliis subquadripinnatis; umbellis pedunculatis quinque - septem - fidis, involuero universali subnullo.



*Cnicus rigida.*